



Fidoyilik —  
Vatanga xizmat demak!

2025-yil 22-aprel, seshanba,  
47 (24.073)-son

O'zbek xalq  
maqoli

Ishyoqmas  
rohat  
topmas

1913-yil aprel oyidan chiqib boshlagan



www.zarnews.uz https://www.facebook.com/zarnews.uz @zarnews\_uz https://twitter.com/zarnews\_uz

## Имом Мотуридий мажмуасида қурилиш ишлари бошланди

Давлатимиз раҳбарининг қарорига кўра, бу йил юртимизда Имом Мотуридий таваллудининг 1155 йиллиги кенг нишонланади. Шу муносабат билан Самарқанд шаҳридаги Имом Мотуридий мажмуасини обод қилиш, ҳудудда қурилиш-таъмирлаш ишларини олиб бориш белгиланган. Яқинда давлатимиз раҳбарининг вилоятимизга ташрифи чоғида қурилиш ишлари лойиҳаси тақдимоти ўтказилган эди.

Вилоят ҳоқими вазифасини бажарувчи Адиз Бобоев ва мутасадди идоралар масъуллари билан бирга мазкур объектда бўлди. Дастлаб, мажмуада ободонлаштириш ва реставрация ишлари бошланиши муносабати билан Қўрғон тиловат қилинди. Шундан сўнг ишлаб чиқилган лойиҳа доирасида амалга ошириладиган ишлар муҳома қилинди.

Реконструкция ишлари давомида бу ерда 1500 ўринли масжид, илмий марказ, кутубхона, музей ва зиёратгоҳ яқинида автотураргоҳ барпо этилади. Шунингдек, мажмуа ҳудудида 2 та минора, айвон ва айвончалар ҳам бунёд этилиши кўзда тутилган. Жараёнда ҳудуддаги айрим турар ва нотурар жойлар, ер участкалари жамоат эҳтиёжлари учун олинди. Учрашувда бу ишларни белгиланган тартиб асосида олиб бориш, мулкдорлар билан очиқ муҳокамалар ўтказиб, тегишли чора-тадбирларни амалга ошириш юзасидан вазифалар белгилаб берилди.



## FUTBOLCHILARIMIZ OSIYODA TENGSIZ



O'zbekiston o'smirlar terma jamoasi Saudiya Arabistonida 17 yoshgacha futbolchilar o'rtasidagi Osiyo kubogida mezbon futbolchilarni 2:0 hisobida yengib, bosh sovrinni qo'lga kiritdi.

Davlatimiz rahbari g'olib futbolchilarga tabrik yo'lladi. Unda shunday deyiladi: "Sizlar kabi navqiron, azmu shijoatli yoshlarimizning butun turnir davomida bironta ham mag'lubiyatga uchramasdan, rekord natija ko'rsatib, jonajon Vatanimiz sharafini mardona himoya qilganlari, hech shubhasiz, milliy futbolimiz tarixiga oltin harflar bilan yoziladigan shonli voqea, desak, to'g'ri bo'ladi".

Terma jamoa safida samarqandlik futbolchilar – Paxtachi tumanidan,

"Paxtakor" jamoasi o'yinchisi Amirxon Murodov hamda Oqdaryo tumanidan, Toshkent futbol akademiyasi tarbiyalanuvchisi Farid Abdullayevlarning borligi quvonarli.

Kecha futbolchilarimiz tantanali kutib olindi. Ularning har biriga Prezident sovg'asi – Cobalt avtomobillari topshirildi. Jamoa bosh murabbiyi "O'zbekistonda xizmat ko'rsatgan sport ustoz"i faxriy unvoni, futbolchilar esa "Kelajak bunyodkori" medali bilan taqdirlandi.

Futbolchilarimizga joriy yilning noyabr oyida Qatarda bo'lib o'tadigan jahon chempionatida Osiyoning g'olib jamoasi sifatidagi ishtirokida ham omad tilaymiz!

Paxtachi tumani viloyat markazidan 140 kilometr masofada joylashgan, viloyatning eng olis tumanlaridan biri hisoblanadi. Tumanda 150 mingdan ortiq aholi istiqomat qiladi va ularning aksariyati dehqonchilik, chorvachilik, savdo va xizmat ko'rsatish sohasida mehnat qiladi. Tuman markazi Ziyovuddin shaharchasi keyingi yillarda butunlay yangi qiyofaga kirdi, yangi binolar, ko'p qavatli uylar, davlat idoralari, istirohat bog'i, madaniy maskanlar qurildi. Aholi bandligini ta'minlash, daromadlarini oshirish, ishsizlikni qisqartirish bo'yicha qator choralar amalga oshirilmog'ida. Bu aholining turmush madaniyatining oshishi, mehnatga bo'lgan munosabatining o'zgarishida ham seziladi.

BESH YILDA SARMOYALAR HAJMI  
13 BAROBAR O'SDI

Tumanda o'tgan yil sanoat, qishloq xo'jaligi va xizmat ko'rsatish sohasida qiymati 27 million dollarlik 54 ta investitsiya loyihasi amalga oshirilib, 1617 nafar fuqaroning bandligi ta'minlangan.

## ПАХТАЧИ QANDAY O'ZGARDI?

- Keyingi besh yilda tumanimizga jalb qilingan sarmoya hajmi 13 baravarga o'sdi, - deydi tuman hokimi o'rinbosari Mansur Abdinabiyev. - Xorijiy investitsiyalar 2024-yil yakuni bilan 23,5 million dollarga yetdi, qo'shma korxonalar 12 ta bo'ldi, 5 turdagi yangi mahsulot ishlab chiqarish yo'lga qo'yildi. Ayniqsa, to'qimachilik, oziq-ovqat, qurilish materiallari sohasida bir qator yangi korxonalar tashkil etildi.

Qurilish materiallari ishlab chiqarish sohasidagi loyihalarning amalga oshirilishi natijasida Qizbuvi tog'i yonbag'ida 10 ga yaqin yangi korxonalar ish boshladi. 20 ga yaqin kon o'zlashtirilib, kaolin, kvarts, granit tosh qazib olinib, qayta ishlanmoqda.

2024-yil yakuni bilan tumandan 13,4 million dollarlik mahsulotlar eksport qilindi. Solishtiradigan bo'lsak, bu 2023-yilga nisbatan 38 foiz ko'p eksport amalga oshirilganini ko'rsatmoqda. Asosan to'qimachilik va qurilish materiallari mahsulotlari

eksport qilinmoqda va 2024-yilda "Paxtachi rodnik yog'" MChJ tomonidan margarin ham eksportga yo'naltirildi.

(Davomi 2-sahifada) >>>

Шу кунларда маҳалла раислиги учун сайловларга тайёргарлик кўриш, уни ўтказиш юзасидан зарур чора-тадбирлар амалга оширилмоқда.

Албатта, жараёнда сарлавҳага чиқарилган савол асосий ўрин тutiши шубҳасиз. Зотан, сайловдан мақсад – шу маҳалланинг кейинги беш йили учун жавобгар ёки мутасадди шахсни танлаб олиш.

Бу борадаги талаблар қонунчиликда аниқ кўрсатиб қўйилган дейишнинг зарури. Рост, қонунда раисга қўйиладиган талаблар белгиланган.

Аммо яқин-яқинларгача маҳалла раиси ёки йиғиндаги бошқа ходим, асосан, пенсия ёшидаги кишилар бўлгани ҳам бор гап-ку. Чунки бу лавозим эгаси арзимаган маош эвазига фаолият юритарди. Бугун вазият ўзгарди, маҳалла жамиятининг "жон томири"га айланди. Энди маҳалла раиси ҳудуднинг том маънода бошқарувчиси саналади.

Маҳалла сайлови:

## Бугунги раис

### қандай бўлиши керак?

Ундан ташқари, бугун тизимдаги ечимини кутаётган кўпгина масалалар ҳал этилган. Хусусан, тузилма фаолияти такомиллаштирилиб, "маҳалла еттилиги"га қатор қўлайликлар яратилди.

Демак, энди сиёсатни тушунмайдиган, ҳудудда обрўйи йўқ, ишни тўғри ташкиллаштиришга олмайдиган, энг муҳими, одамларни бирлаштиришга олмайдиган раислар ўз ўрнини бошқа номзодга бўшатишга мажбур.

Нега? Биринчидан, маҳаллаларнинг ички йўллари ҳолатини яхшилаш бўйича маҳалла раиси масъул!

Вазирлар Маҳкамасининг 2024 йил 18 майдаги қарори билан "маҳалла еттилиги"га ҳар ойлик иш режаларида устувор равишда асосий тадбир ва вазифалар кўрсатиб ўтилган. Унга кўра, маҳалла инфратузилмасини яхшилаш бўйича асосий тадбир ва вазифа-

лар маҳалла раиси томонидан амалга оширилиши белгилаб берилган.

Бу раисдан масъулият ва ташкилотчиликдан ташқари, бошқа сифатларни ҳам талаб қилади.

Қолаверса, ҳоким ёрдамчиси, ёшлар етакчиси, хотин-қизлар фаоли, ижтимоий ходим, солиқ ва профилактика инспекторлари маҳалла раислари билан ҳамжиҳатликда ишлайди.

Шундай экан, маҳалла раиси бугун еттилик зиммасига юкланган вазифаларни ҳам яхши билиши керакми? Бундай бўлмаса, улар фаолияти юзасидан бераётган баҳоси қанчалик адолатли бўлиши мумкин?

Адолатсизлик бўладиган бўлса, иш орқага кетиши, еттилик ўртасида низо чиқиши аниқ-ку.

- Қуйи бўғиндаги барча муаммо маҳаллага

келиб тақалади, шу боис маҳалла раиси мазкур жараённинг ҳаммасида иштирок этиши шарт, - дейди маҳаллалар уюшмаси вилоят бошқармаси раиси Шерали Йўлдошев. - Аммо шундай паллада раисларни қийнаб келаётган бир масала юзга чиқарди: маҳалланинг ўз наблағига эга эмаслиги.

Маҳаллалар ўз ҳудудидаги айрим камчиликлар масалан, ички йўллارни таъмирлаш, пиёдалар йўлакларни қуриш, болалар, спорт майдончалари бунёд этишни ўз билганича ҳал қилмасди. Ўзида маблағ бўлмагани боис давлат дастурларига кўз тикар ёки бирор саҳий тадбиркор кўлига қараб қоларди.

"Маҳалла институтининг жамиятдаги ролини тубдан ошириш ва унинг аҳоли муаммоларини ҳал этишда биринчи бўлин сифатида илаштини таъминлашга қаратилган чора-тадбирлар тўғрисида"ги Президент фармони асосан, барча маҳаллаларда "Маҳалла бюджет" тизимининг жорий этилгани юқоридаги камчиликларга барҳам бериб, маҳалланинг сиёсий, ижтимоий ва иқтисодий салоҳиятини оширди. Энди маҳалла давлатга қарам бўлиб, давлатдан пул сўраши эмас, балки мустақиллигини таъминлашга интилиши керак.

Аммо маҳаллалар фақатгина жамғарма маблағларига боғлиқ қолмаслиги зарур. Зеро, йиғиларнинг даромад манбаларини кенгайтириш имкониятлари бор, бундан,

албатта, унумли фойдаланиш лозим.

Англашиладики, энди маҳалла раислигига номзодлар етук тадбиркорлар, ташкилотчилик қобилиятига эга инсонлар орасидан танланиши маҳалланинг молиявий имкониятларини янада кенгайтириб, қўшимча даромад манбаларини яратишга хизмат қилади. Қолаверса, кредит, субсидия ажратиш билан боғлиқ масалалар маҳалланинг ўзида ҳал этилар экан, раиснинг молия соҳасидан хабардор бўлиши, иқтисодчи каби фикрлаши муҳим аҳамиятга эга.

Гап маҳалла раислигига номзодлар ҳақида кетаркан, яқинда эълон қилинган хабар эътиборни торди: Ҳокимларнинг ўринбосарлари ва "Маҳалла еттилиги"га яна бир вақолат берилди.

Энди ҳокимларнинг ўринбосарлари ва "Маҳалла еттилиги" фақат муаммоларни тинглаб қолмай, томорқа ва ижарага олинган ерлардан қандай фойдаланилаётганини ҳам назорат қилади.

Қўринадики, энди маҳалла раислигига номзодлар аввалгидек пенсионер ёки ижтимоий соҳада ишлаган олий маълумотли шахс бўлиши камлик қилади.

Ё.МАРҚАЕВ тайёрлади.

Мулоҳаза



# PAXTACHI QANDAY O'ZGARDI?

(Davomi. Boshlanishi 1-sahifada).

Tumanimizda xitoylik tadbirkorlar bilan hamkorlikda o'tgan yili 4,2 million dollarlik loyiha doirasida gips kukuni tayyorlash hamda qiymati 1 million dollarlik chiqindi plastiklardan qop ishlab chiqarish loyihalari amalga oshirildi. Bundan tashqari, Xitoy fuqarosi boshchiligidagi "Dachuanfeshery" MChJ xorijiy korxonasi tashkil etilib, qiymati 2 million dollarlik baliqchilik xo'jaligi tashkil etilmoqda.

Joriy yilda sanoat, qishloq xo'jaligi va xizmat ko'rsatish sohalari qiyamati 37,9 million dollarlik 39 loyiha amalga oshirilishi rejalashtirilgan va bu orqali 1700 dan ortiq yangi ish o'ri yaratiladi. Xorijiy investitsiya mablag'larini jalb qilish maqsadida tumanida qiymati 135,3 million dollarlik 6 ta xorijiy investitsiya loyihasi shakllantirildi. 64,5 million dollarlik to'g'ridan to'g'ri xorijiy investitsiyalar hamda kreditlar o'zlashtirilishi rejalashtirilgan va joriy yilning dastlabki oylarida 8,2 million dollar xorijiy investitsiya mablag'lari o'zlashtirildi.

Iqtisodiy rivojlanishda eng muhim yo'nalishlardan biri eksportni tashkil etish hisoblanadi. Hozirda tumanida 11 ta eksportyor korxonaga faoliyat yuritmoqda va ular sanoat mahsulotlari va meva-sabzavot eksporti bilan shug'ullanadi. Ushbu korxonalar tomonidan joriy yil yakuniga qadar jami 18,7 million dollarlik mahsulotlarni eksport qilish rejalashtirilgan. Yilning dastlabki choragida 6 million 254 ming dollarlik mahsulotlar eksportga yo'naltirildi.

Raqamlarga qaraydigan bo'lsa, tumanida drayver loyihalarni amalga oshirish va tadbirkorlarga ko'maklashish maqsadida alohida reja ishlab chiqilgan. Unga ko'ra, tumanning Fay mahallasida 300 gektar maydonda yangi bog'-tokzorlar barpo qilish hisobiga 30 ta tadbirkorlik subyekti tashkil qilish, Ukrach mahallasidagi bo'sh turgan yer maydonlarida 6 ta ishlab chiqarish loyihalasini amalga oshirish, Yangiobod mahallasida sanoat markazi tashkil etish rejalashtirilgan. Suluvqo'rg'on mahallasida bo'sh turgan 0,5 gektar yer maydonida zarur infratuzilmani ta'minlash orqali Zarafshon daryosi bo'yida 9 ta savdo va xizmat ko'rsatish loyihasi amalga oshiriladi.

## FERMERLIKDAN KLASTERGA

Dunyo tajribasidan ko'rinadiki, xomashyo yetishtirish juda katta daromad keltirmaydi. Qachonki xomashyoni qayta ishlash, qadoqlash, eksport qilish yo'lga qo'yilsagina foyda bir necha barobarga ortadi. Bu yangi ish o'rinlari ochish, qo'shilgan qiymat zanjirini yaratish, soliq tushumlarini ko'paytirish, ishsizlikni kamaytirish va taraqqiyotga erishishda muhim bosqich hisoblanadi. Ayni shu jihatlarni inobatga olinib, davlatimiz rahbari fermer xo'jaliklarini yiriklashtirish, sohaga klaster tizimini joriy etishni taklif qilgandi. Tumanida bu tashabbusni to'g'ri amalga oshirgan fermer bugun yirik korxonaga egasi bo'ldi.

2003-yilda kichik maydonda paxta va g'allachilik yo'nalishida tashkil etilgan fermer xo'jaligimiz 2008-yilda 100 gektarga yetdi, - deydi tumandagi "Mirzayev Shuhrat Kenjaevich" fermer xo'jaligi boshlig'i Shavkat Mirzayev. - 2020-yilda g'allachilik klasteriga aylantirdik va g'o'za, g'allaning elita navlari urug'larini yetishtirishni yo'lga qo'ydik. Shu yilning o'zida g'allani un holda sotish loyihalasini amalga oshirdik. Buning uchun Germaniya, Italiya va Turkiyadan zamonaviy uskunalar olib kelindi va 60 sotix maydonda yangi zavod quridik. Ushbu zavod kuniga 120 tonna g'allani qayta ishlaydi va mahsulotini ichki bozordan tashqari Tojikiston, Afg'oniston davlatlariga eksport qilamiz. O'tgan yili qo'shni davlatlarga 1,5 million dollarlik 6 ming tonna un eksport qildik. Tumandagi 215 ta fermer xo'jaligi bilan 16 ming tonna g'allani xarid qilish bo'yicha shartnoma tuzganmiz.

Endi tumanida qishloq xo'jalik mahsulotlari urug'larini tayyorlash, saralash va qadoqlashga mo'ljallangan 1,2 million dollarlik loyiha ustida ishlayapmiz. Buning uchun joy, bino bor, 200 kVtlik quyosh panellari ham o'rnatyapmiz. Ayrimlar bu loyiha nima uchun kerakligiga tushunmayapti. Hozirda respublikamizga Turkiya yoki boshqa davlatlardan qishloq xo'jalik mahsulotlari urug'i valyuta

hisobiga keltiriladi, lekin sifat va navi siz kutgandek chiqishi dargumon. Bizning loyihamizda buning uchun maxsus laboratoriya bo'ladi va urug'lar davlat standart bo'yicha tekshirilib, muvofiqlik sertifikatini olinadi, ochiq maydon yoki issiqxonaga uchun mos navlar aniqlanadi.

Masalan, tumanimizda takroriy ekin mavsumida 5 ming tonnadan ortiq mosh yetishtiriladi, lekin hech kim urug' tayyorlamaydi. Hamma boshqa hududda saralab, chiroyli qadoqlangan va uch barobar qimmat moshni yaxshi urug'lik, deb sotib olaveradi. Hozir viloyatdagi klaster korxonalarida shunga

o'xshash lekin kichik loyihalar bor, ular faqat o'zlariga kerakli urug'lik tayyorlashadi. Bizdagi g'o'za va g'alla urug'iga Tojikistonda talab yuqori, lekin buning eksporti yo'lga qo'yilmagan. Shuning uchun biz sifat kafolati 95 foizgacha bo'lgan urug'larni taklif etamiz. Germaniyadan kerakli uskunalarni keltirish bo'yicha ish olib boryapmiz. Hozir un zavodida 72 nafar xodim ishlayotgan bo'lsa, ushbu loyiha ishga tushgandan keyin ishchilar soni 100 dan ortadi.

Yana bir yangi loyihamizda 50 ta xotin-qiz uchun tikuvchilik korxonasi tashkil etmoqchimiz. Bu loyihaning o'ziga 5 nafar usta tikuvchini tanlab olib, ularni Turkiya va Italiyada dizayn sohasida o'qitishni maqsad qilganmiz. Xitoydan mato olib kelib, tayyor kiyimlar tikish va shourumlarni ham shu yerda o'tkazish bo'yicha ish olib boryapmiz.

Aholi bandligini ta'minlash, daromadlarini oshirish va qishloq xo'jalik mahsulotlari yetishtirishni ko'paytirishda aholiga yerlarni ijaraga berish tizimi ancha samarali bo'lmoqda. Prezidentimizning 2025-yil 14-fevraldagi "Tomorqa yer egalari va dehqon xo'jaliklari faoliyatida zamonaviy tashkiliy tizimni joriy qilish va moliyaviy qo'llab-quvvatlashning qo'shimcha chora-tadbirlari to'g'risida"gi farmoniga asosan, tomorqa yerlari va dehqon xo'jaliklariga ko'maklashish vazifasi Kambag'allikni qisqartirish va bandlik vazirligi va hududiy bo'limlariga yuklatildi. Raqamlarga qaraydigan bo'lsa, tumanida 32,2 mingdan ortiq tomorqachi, 1,9 ming gektardan ortiq ekin maydoni, shundan 193 gektarida issiqxonalar bor.

Bundan tashqari, tumanida 3929 nafar yoshlar va kambag'al oilalarga ijaraga asosida tarqatilgan 1079 gektar yer maydonlarida poliz-sabzavot, kartoshka, dukkakli va boshqa ekinlar ekishga ko'maklashish tizimi yo'lga qo'yilgan.

## DRAYVER YO'NALISHLARDA YANGI LOYIHALAR ISHGA TUSHIRILADI

Tumanimizda Zarbdor tajribasi asosida sanoat, xizmat ko'rsatish va qishloq xo'jaligi yo'nalishida 6 ta drayver loyiha aniqlangan, - deydi tuman hokimining o'rinbosari G'olibjon Absanov. - Yil yakunigacha ushbu loyihalar hisobidan 110 ga yaqin yangi tadbirkorlik subyektlari tashkil qilish hisobiga qo'shimcha 450 ta ish o'ri yaratiladi va budgetga qo'shimcha 9,6 milliard so'm tushum tushiriladi. Loyihalarni amalga oshirish uchun respublika budgetidan 7,5 milliard so'm mablag' talab etilishi hisob-kitob qilingan.

Prezidentimizning 2024-yil 20-dekabrda "Hududlarda yuqori iqtisodiy o'sish va aholi bandligini ta'minlashning yangi tizimini yo'lga qo'yish hamda bu borada mahalliy hokimliklarning roli va mas'uliyatini oshirish chora-tadbirlari to'g'risida"gi farmoniga asosan, mazkur loyihalarning manzilli ro'yxati xalq deputatlari shahar, tuman va viloyat Kengashlari sessiyalarida ko'rib chiqilib, kengashlar qarori bilan tasdiqlandi. Loyihalarni amalga oshirishning birinchi bosqichida qiymati 88 milliard so'mlik 4 ta drayver loyi-

ha uchun infratuzilma obyektlarini qurishga respublika budgetidan 7,2 milliard so'm mablag' ajratildi.

Tumandagi asosiy yo'nalishlardan yana biri chorvachilik tarmog'i hisoblanadi. Hozir tumanida chorvachilik yo'nalishidagi 182 ta fermer xo'jaligi faoliyat yuritadi. Shundan qoramolchilik 34 ta, qo'ychilik 74 ta, parrandachilik 39 ta, baliqchilik 26 ta, asalarichilik yo'nalishida 9 ta xo'jalik mavjud.

2025-yil dasturiga asosan xitoylik investorlar tomonidan 14 milliard so'mlik baliqchilik loyihasi amalga oshirilmog'ida va bu loyihada 25 ta ish o'ri yaratilib, yiliga 80-100 tonnagacha baliq mahsulotlari ishlab chiqariladi.

## HAR QANDAY TARAQQIYOTNING DOYASI - KITOB

Ishlashga o'rgangan odammiz-da, 2017-yilda pensiyaga chiqqanimdan keyin bekor o'tirolmadim, - deydi Marziya Yorqulova. - Oqtepa qishlog'imizda hech qanday ishlab chiqarish yo'q, odamlar faqat dehqonchilik va chorvachilik bilan band, yerlarni xususiyashtirish, bozor iqtisodiyotiga o'tish davri edi. Ko'pgina aholi ishsiz qolib, davlatimiz zavod, fabrika qurib bersa, ishlaymiz degan o'yda, tadbirkorlik va biznes tushunchasi, tasavvuri ham kam. Kutubxonalar qisqartirilib, kollejlarda ARM shaklida tashkil etilib, kollej o'quvchilaridan boshqa aholi deyarli o'qishga kelmas edi. Shu bois bir paytlar har bir guruhga tadbirkorlik va biznes asoslari darsligini elektron variantdan qo'zgacha chiqarib kitoblar taxlaganmiz. Davlatimiz siyosati yoshlarni qo'llab quvvatladi, iqtidorli, chiroyli biznes g'oyalarni har xil tanlov va loyihalar asosida ularga imtiyozli kreditlar orqali ish boshlashlariga ko'maklashdi. Natijada o'quvchilarim "Mening biznes g'oyam" respublika tanlovida, 4 nafar o'quvchimiz viloyatda "Diplomi bilan biznesga", 50 nafari "Ishbilarmon o'quvchi" loyihalarida qatnashdi. "Ishbilarmon o'quvchining eng yaxshi loyihasi" respublika tanlovi g'olibi bo'lib, o'z ishlarni boshlashdi. Lekin aholi o'rtasida hamon tadbirkorlik borasida tushunchalar kam edi. Qishlog'imiz Zarafshon daryosining bo'ylariga tutash bo'lib, bolaligimdan daryo bo'ylarida, mol boqib katta bo'lganmiz. To'qayzorlar, suv havalari, qumloqlar yastanib yotardi. Asta-sekin mazkur joylar ishlab chiqarish tomonidan baliqxonalar qurilgan bo'lib, daryo bo'ylariga cheklolvar bo'lib, qishlog'imiz ishsiz aholisi yollanma ishchi bo'lib, kun o'targa ishlar edi. Daryo bo'yidagi ko'p yer bo'sh yotsada, aholidan biznes g'oya chiqmadi. Shunda aholi uchun kutubxonaga tashkil qilishni o'yladim. 2019-yilda mahalla faollari fikrimni quvvatlab, kutubxonaga uchun sobiq Oqtepa jamoa xo'jaligining eski faollar zalini berishdi. Kutubxonaga tashkil etdik va aholidan kitoblar yig'ildi, kitobi yo'qlar 50 mingdan 300 ming so'mgacha pul mablag'lari hadya qilishdi. Tuman hokimligi tomonidan kerakli jihozlar berildi. Usta yigitlarimiz hashar yo'li bilan eski binoni ta'mirladi, tumanimizda ulg'aygan ziyolilar ko'plab noyob kitoblar sovg'a qilishdi. Kitobsevarlarning ko'magida kutubxonamizga 4 mingdan ortiq badiiy adabiyot, sohalarga oid qo'llanmalar jamlandi. Hozir kutubxonaga doimo kitobxonlar bilan gavjum.

2024-yildan faol kitobxon nuroniy otaxon va yanxonlar nabalari bilan Samarqandga rag'bat sifatida bepul sayohatlar uyushtirilib, viloyatdagi kutubxonalar bilan yaqindan tanishtirilib, "Kitobxon ona, kitobxon bola", yangi adabiyotlar taqdimotlari, qishloqdosh ilmiy xodimlarimiz bilan muloqot va badiiy kechalar o'tkazilmog'ida. Endi "Kitobxonlik haftaligi"da viloyat kutubxonalariga va Samarqand shahri bo'yab tarixiy yodgorliklarga sayohat uyushtirish rejalashtirilmoqda.

Qishloqqa kutubxonaga nima uchun kerak, deguvchilar ham topiladi. Har qanday g'oya, ilm, yutuqning asosi kitobda mujassam bo'ladi. Kitob pul bermasligi mumkin, lekin insonning aqliy faoliyatini rivojlantiradi, hayotga qarashlarini o'zgartiradi, xalqni ilmi qiladi. Har qanday loyihani amalga oshirishda ham o'zga-chayondashuv, g'oyaviy yechimlar kitobda mujassam bo'ladi. Avval boshida kutubxonaga keluvchilar sanoqli bo'lgan bo'lsa, kitob qanchalik ma'naviy ozuqa berishini anglagan Oqtepa va Urganji qishloqlaridan kutubxonaga keluvchilar soni tobora ortib bormog'ida.

Joriy yilda esa kamtarona mehnatlarimiz e'tirof etilib, 8-mart bayrami arafasida davlatimiz rahbari tomonidan "Shuhrat" medali bilan taqdirlandim. Bunday e'tirof uchun kutubxonani tashkil etishda ko'maklashgan barchadan minnatdorman.



## Suv tejavchi texnologiya joriy qilinsa, hosildorlik oshadi

O'tgan yil respublikamizda foydalanilgan o'rtacha yillik suv miqdori 51-53 milliard kub metrni tashkil etib, suv olish limitiga nisbatan 20 foizga qisqargan.

Yildan yilga kuchayib borayotgan suv taqchilligi hamda suv resurslariga bo'lgan ehtiyoj xo'jaligida suvdan foydalanish samaradorligini keskin oshirishni taqozo etmoqda. Bu esa o'z navbatida zamonaviy sug'orish texnologiyalaridan keng foydalanish lozimligini ko'rsatmoqda.

Viloyatimizda 2024-yilda 61,1 ming gektar maydonda, jumladan, 10,4 ming gektar maydonda tomchilatib, 3200 gektarda yomg'irlatib sug'orish va 11,6 ming gektarda sug'orishning boshqa turlarida suv tejavchi texnologiyalar yo'lga qo'yildi. Hozirda viloyatimizda 380 ming gektardan ortiq sug'oriladigan ekin maydoni bor va bu maydonlarni sug'orish uchun o'tgan yili barcha suv manbalaridan 2455 million metr kub suv sarflandi.

2024-yilda suv tejavchi texnologiyalarni joriy etish, kanal va ariqlarni betonlashtirish, suv xo'jaligi sohasini raqamlashtirish, ekin maydonlarida qo'shimcha agrotexnik tadbirlarni amalga oshirish hisobiga 460 million kub metr suv tejashiga erishildi, - deydi Zarafshon irrigatsiya tizimlari havza boshqarmasi boshlig'ining birinchi o'rinbosari Mahmud Turniyazov. - Joriy yilda umumiy sug'oriladigan yerlarning 50 foizida suv tejadigan texnologiyalarni joriy etish rejalashtirilgan. Ushbu chora hamda kanal va ariqlarni betonlashtirish, sohani raqamlashtirish orqali 590 million metr kub suv isrof bo'lishining oldi olinadi.

Urgut tumanida 218,6 kilometr irrigatsiya tarmoqlari (magistral kanallar 77,5 kilometr, ichki xo'jaliklararo kanallar 141,2 kilometr) hamda 1044 kilometr ichki xo'jalik ariqlari mavjud. Bugungi kunda magistral va ichki kanallarning 38,1 kilometri (38,3 foiz), ichki xo'jalik ariqlarining 214,1 kilometri (20,5 foiz) betonlashtirilgan. 2024-yilda klaster va fermerlar mablag'lari hisobidan 168 kilometr ichki ariqlar betonlashtirildi. 2025-yilda 107,5 kilometr kanal va ariqlarni betonlashtirish rejalashtirilgan. Yil boshidan buyon rejadagi 50 foiz ariq va kanallarda betonlashtirish ishlari bajarildi. Hozirda Qozonariq kanalining 4,5 kilometr qismini betonlashtirish bo'yicha ishlar bajarilmog'ida.

Bu borada Toyloq tumanida ham ko'zga ko'rinarli ishlar amalga oshirildi. Masalan, o'tgan yilda tumandagi 838 gektar maydonda tomchilatib va yomg'irlatib sug'orish texnologiyalari joriy qilindi. Xususan, tumandagi Bog'izog'on agrofirma hududidagi "Ilg'or agro texnologiyalar" fermer xo'jaligi 10 gektar maydondagi piyoz ekinini tomchilatib sug'orib, hosildorlikni 1,5 barobarga oshirishga erishdi. "Turon" fermer xo'jaligi 8 gektar sabzavot maydonida tomchilatib sug'orish texnologiyasini joriy etib, gektaridan 50-55 tonna hosil oldi. 2025-yilda tumanida 400 gektar maydonda tomchilatib va 200 gektar maydonda yomg'irlatib sug'orish texnologiyasini qo'llash rejalashtirilgan.

Jomboy tumanida 2024-yilda 2065 gektar maydonda suv tejavchi texnologiyalarni joriy qilish rejalashtirildi, amalda esa 2715 gektar maydonda shunday tejamar texnologiyalar o'rnatildi, - deydi Jomboy tuman "Suv yetkazib berish xizmati" davlat muassasi direktori Sherzod Salimov. - Chunki odamlar eshitganiga emas, ko'rganiga ishonadi. Suv tanqisligi bor, buni barcha dehqonlar yaxshi biladi, lekin tejavchi texnologiya o'rnatish bo'yicha topshiriq dehqonni ikkilantiradi. Qachonki o'rnatilgan va samara keltirishini ko'rsa, o'zi harakat qilib, katta mablag' sarffasa ham shunday texnologiyani o'rnatadi. Rejaga qo'shimcha o'rnatilgan xo'jaliklar ham hududdagi fermer xo'jaliklardan ko'rib, o'zlari shu

ishga kirishib, o'rnatishdi. 2025-yilda 2000 gektar maydonda suv tejavchi texnologiyalarni joriy qilish rejalashtirilgan. Shundan 450 gektar maydonda tomchilatib, 300 gektar maydonda yomg'irlatib, 700 gektarda lazerli tekislash va 550 gektar maydonda egiluvchan quvurlar yordamida sug'orish texnologiyasi yo'lga qo'yiladi.

Hozirgi kunga qadar suv iste'molchilari tomonidan 50 gektar yer maydonlarida tomchilatib sug'orish va 14,4 gektar yer maydonda yomg'irlatib sug'orish texnologiyalarini joriy qilish bo'yicha ishlar boshlangan. Tumanida 2024-2025-yillarda "Suv yetkazib berish xizmati" DM hisobidagi 34 kilometr kanallarni betonlashtirish ishlari amalga oshirilmog'ida. Shuningdek, klaster va fermer xo'jaliklarining 74 kilometr xo'jalik ichki sug'orish tarmoqlari betonlashtirilmog'ida.

Tasarrufimizda 30,8 gektar yer maydoni bor va xo'jaligimiz joylashgan Beshbola mahallasi hududida oqar suvda muammo bor, - deydi "Turdiyev Dilshod agrozamini" fermer xo'jaligi boshlig'i Dilshod Turdiyev. - Fermer xo'jaligimiz g'alla, sabzavotchilikka ixtisoslashgan, lekin suv yo'qligidan mahsulot yetishtirish juda qiyin ahvolga kechadi. Shuning uchun texnologiyalardan foydalanishga qaror qildim. Uskunalarini turlarini va narxlarini o'rganib, Turkiya texnologiyasi menga ma'qul keldi. 2021-yilda qishlog'imizda Turkiyaning suv tejavchi uskunalarini sotadigan do'kon va o'rnatish xizmatini ko'rsatuvchi markaz ochildi. Ular bilan maslahatlashib, gektariga o'rtacha 25 million so'mdan pul sarflab, 22,5 gektar maydonda tomchilatib sug'orish texnologiyasini o'rnatdik. Yozda ariqlarda ham suv bo'lmisligini hisobga olib, katta hovuz qazirdik va bu yerda to'plangan suv ekinlarni sug'orishga yetadi. Tomchilatib sug'orish mineral o'g'it sarfi va qo'shimcha ishlov, texnika xarajatini kamaytirdi. Masalan, avval piyoz ekib, gektariga 40 qop o'g'it bergan bo'lsa, endilikda 15 qop o'g'it yetadi, hosildorlik esa 25-30 foiz yuqori bo'lyapti. Faqat bitta qiyinchiligi - katta motorlar o'rnatilganligi tufayli elektr energiyasini joriy etish uchun bitta tugmani bosish bilan ikki soatda barcha maydonni sug'orish mumkin.

Prezidentimizning 2024-yil 5-yanvardagi "Quy bo'g'inda suv resurslarini boshqarish tizimini takomillashtirish hamda suv resurslaridan foydalanish samaradorligini oshirish chora-tadbirlari to'g'risida"gi qarorida suv tejavchi texnologiyalar uchun kreditlar 14 foizda 5 yilga garov ta'minotisiz ajratilishi, suv tejavchi texnologiyalar uchun subsidiyalar 100 foiz shu yilning o'zida ajratish (amalda 2 yilda 50 foizdan) va asosan kreditni so'ndirishga qarantilishi belgilangan. 2025-yildan boshlab suv o'lchagichlardan foydalangan yoki suv tejavchi texnologiyalarni joriy qilganlar uchun soliq stavkasi 0,7 (70 so'm) va 0,5 (50 so'm) koeffitsientda qo'llaniladi. Aksincha, suv hisobini yuritishdan bosh tortgan va o'lchagichlardan foydalanmaganlar uchun soliq stavkasi 1,5 (150 so'm) va 2 (200 so'm) barobar ko'paytirilib hisoblanishi keltirib o'tilgan.

1 gektar sabzavot maydonini bir marotaba sug'orish uchun o'rta xisobda 700 metr kub suv talab etiladi, lekin tomchilatib sug'orish texnologiyasi qo'llanilgan, 400-450 metr kub suv talab etilib, 250-300 metr kub suv talab etiladi. Bu bilan mavsum davomida 1 gektar sabzavot maydonidan 3700-4000 kub metr suv iqtisod qilinishiga erishiladi.

1 gektar g'alla maydonini bir marotaba sug'orish uchun 1100 metr kub suv talab etiladi, yomg'irlatib sug'orilganda esa 670 metr kub yetadi. Mavsum davomida 1 gektar g'alla maydonidan 1720 metr kub suv iqtisod qilinishi mumkin.

**21-25-aprel kunlari o'tkazilayotgan "O'zbekiston – kitobxonlar yurti" shiori ostidagi V respublika kitobxonlik haftaligi kecha Samarqandda ham tantanali boshlandi.**

Pushkin nomidagi viloyat axborot-kutubxona markazida haftalik ochilishi marosimida viloyat hokimligi mas'ullari, davlat va jamoat tashkilotlari vakillari, shoir va yozuvchilar, o'quvchi va talaba yoshlar ishtirok etdi.

Viloyat hokimi o'rinbosari Rustam Qobilov, O'zbekistonda xizmat ko'rsatgan jurnalist Farmon Toshev, O'zbekiston Yozuvchilar uyushmasi viloyati bo'limi raisi Toshpo'lat Tugalov yurtimizda aholining kitobxonlik madaniyatini oshirish, yoshlarning kitobga mehrini oshirish borasida amalga oshirilayotgan ishlar, xayriy tashabbuslar haqida so'z yuritdilar. Shuningdek, "Sevimli kutubxonamga kitob sovg'a qilaman" aksiyasi doirasida viloyat axborot-kutubxona markaziga kitoblarni tufha qildilar.

Shundan so'ng O'zbekistonda xizmat

## Kitobxonlik haftaligi kitob sovg'a qilish bilan boshlandi



ko'rsatgan jurnalist, taniqli publitsist adib Nusrat Rahmatning buyuk jadid, ma'rifatparvar Mahmudxo'ja Behbudiya bag'ishlangan "Jadid" kitobi taqdimoti o'tkazildi.

– Haftalik doirasida markazimizda ko'plab tadbirlar rejalashtirilgan, – deydi viloyat axborot-kutubxona markazi direktori Zebiniso Shodieva. – Jumladan, bir qator yangi asarlar taqdimotlari, shoir va yozuvchilar bilan uchrashuvlar, "Kitob va kino" hamda "Kitobxonlik oiladan boshlandi" ko'rik-tanlovlari, "Zakovat" intellektual o'yini, xalqimizning kitobxonlik madaniyatini oshirishga qaratilgan davra suhbatlari o'tkaziladi. Shunday tadbirlar tuman va shaharlar, ta'lim muassasalaridagi kutubxonalarda ham tashkil etilishi ko'zda tutilgan. Besh kun davomida barcha kutubxonalarda "Sevimli kutubxonamga kitob sovg'a qilaman" aksiyasi o'tkaziladi.

### Huquqiy savodxonlik



**O'zbekiston Respublikasining Fuqarolik kodeksiga ko'ra, yo'qolgan ashyoni topib olgan shaxs bu haqda uni yo'qotgan shaxs yoki ashyo egasini yoxud uni olish huquqiga ega bo'lgan o'zga ma'lum shaxslardan birontasini darhol xabardor etishi hamda topilgan ashyoni shu shaxsga qaytarishi shart. Ashyo binoda yoki transportda topilgan bo'lsa, u shu binoning yoki transport vositasining egasiga topshirilmog'i lozim. Topilma topshirilgan shaxs ashyoni topib olgan shaxsning huquqlarini qo'lga kiritadi va uning majburiyatlarini o'z zimmasiga oladi.**

## Topilma uchun mukofot talab qilishga haqlisiz

Basharti, topilgan ashyo qaytarilishini talab qilish huquqiga ega bo'lgan shaxs noma'lum bo'lsa yoki uning manzili ma'lum bo'lmasa, ashyoni topib olgan shaxs topilma to'g'risida ichki ishlar, tegishli davlat idoralari yoki fuqarolarning o'zini o'zi boshqarish idorasiga ma'lum qilishi shart.

Ashyoni topib olgan hamda uni olishga haqli bo'lgan shaxsga qaytarib bergan shaxs ana shu shaxsdan, ashyo davlat mulkiga yoki fuqarolarning o'zini o'zi boshqarish organi mulkiga o'tgan hollarda esa tegishli davlat yoki fuqarolarning o'zini o'zi boshqarish idorasidan ashyoni saqlash, topshirish yoki sotish bilan bog'liq xarajatlarni, shuningdek, ashyoni olishga haqli bo'lgan shaxsni topish uchun ketgan xarajatlarni undirish huquqiga ega.

Ashyoni topib olgan shaxs uni olishga haqli bo'lgan shaxsdan

topilma uchun ashyo qiymatining yigirma foiziga qadar miqdorida mukofot talab qilishga haqlidir.

Basharti topib olingan hujjatlar yoki o'zga ashyolar ularni olishga haqli bo'lgan shaxsning o'zi uchun-gina qilingan bo'lsa, mukofot miqdori shu shaxs bilan kelishuv asosida, kelishuvga erishib bo'lmagan taqdirda esa sud orqali belgilanadi. Topilgan ashyoni qaytarib berishni talab qilishga haqli bo'lgan shaxs topilma uchun ko'pchilik o'rtasida mukofot va'da qilgan bo'lsa, u ko'pchilik o'rtasida va'da qilingan mukofotni o'sha shartlarga muvofiq to'laydi.

Ashyoni topib olgan shaxs topilma haqida xabar qilmagan bo'lsa yoki uni yashirishga urin-gan bo'lsa, mukofot olish huquqi vujudga kelmaydi.

**Azizbek NORBEKOV,**  
Samarqand shahar Davlat xizmatlari markazi yetakchi mutaxassisi.

### Sog'ligimiz o'z qo'limizda



## Bolalarning yashirin dushmani

Har bir ota-ona o'z farzandining sog'lom voyaga yetishini xohlaydi. Biroq ular da sodir bo'layotgan keskin o'zgarishlarni sezmay qolamiz. Bolalarimizning uyqusida bezovta bo'lishi, ishtahasi yo'qolib, ovqatlanmay qo'yishi, ich ketishi va vazn tashlashiga odatdagidek holat deya e'tibor bermaymiz. Aslida bu belgilar ko'plab kasalliklarning sabablari bo'lishi mumkin. Ayniqsa, ular dan biri, ko'pchiligimizga unchalik tanish bo'lmagan, lyamblioz deb atalmish parazit kasalligidir.

Lyambliya – bu mikroskopik bir hujayrali parazit bo'lib, inson organizmida, ichaklarda yashaydi. U asosan suv yoki yuvilmagan qo'l, oziq-ovqat mahsulotlari bilan tanamizga tushadi. Ichaklarga joylashib olib, organizmga kerakli bo'lgan oziq moddalarini o'zlashtirib, inson sog'lig'iga zarar keltiradi. Shuningdek, bolalar bog'chalarda sanitariya va gigiena tartib-qoidalariga rioya qilinmagan holda yuqtirib olishlari mumkin.

Lyambliozning asoratlari har doim ham ko'rinib turmaydi. Lekin ko'plab belgilari bor. Jumladan, ishtahaning yo'qolishi, ich ketish yoki ich qotishi, qorinda

og'riq, holsizlik yoki bosh aylanishi kabi belgilari bilan namoyon bo'ladi. Bolalarda jismoniy rivojlanish sekinlab, vazn yo'qotishlar kuzatiladi, allergik toshmalar-ga moyilligi kuchayadi.

Lyambliozni qon va najas tahlili yoki maxsus laboratoriya usullarini qo'llash orqali aniqlab, shifokor nazorati ostida davolash mumkin. Odatda, lyambliya parazitlarga qarshi dori-darmonlar yordamida yo'q qilinadi. Shuningdek, maxsus parhezga rioya qilish, immunitetni mustahkamlash uchun muhim ahamiyatga ega.

Har qanday kasallikning oldini olish, uni davolashdan ko'ra osonroq, deydishadi shifokorlar. Ovqatlanishdan oldin va hojatdan so'ng qo'llarni yuvish, qaynatilgan yoki tozalangan suv ichish, meva-sabzavotlarni yeyishdan oldin yaxshilab yuvish kabi oddiy gigiyena qoidalariga rioya qilish orqali lyambliozdan saqlansa bo'ladi.

**Shahnoza HAMROYEVA,**  
Sanitariya-epidemiologik osoyishtalik va jamoat salomatligi qo'mitasi Samarqand shahar bo'limi parazitolog shifokori.

Shunday insonlar b'ladiki, bu dunedan utgani dan sun'g ezgu ishlarini oadamlar qalbidagi umrboqiy saqlanib qoladi va doimo eslanadi. Moxir pedagog, jonkuяр ustoz, Samarqand musiqa san'ati rivожiga salmoqli хиссасини qushan san'atkor Javodbek Kozimov ana shunday insonlardan эди. Ўзбекистон композиторлари ва бастакорлари уюшмаси азъоси, доцент, халқаро Турон академияси академиги Javodbek Kozimov ҳаёт бўлганида 65 баҳорни қаршилаган бўларди.

## Санъатга бахшида умр

Ж.Козимов 1960 йил 30 октябрда Самарқанд шаҳридаги Беклар маҳалласида туғилган. Умумтаълим мактабини битиргандан сўнг санъатга бўлган қизиқиши уни Ҳожи Абдулазиз Абдураулов номидаги Самарқанд musiqa билим юртига етаклади. Ўқишни муваффақиятли битириб, Самарқанд давлат педагогика институтининг педагогика ва бошланғич таълим факультетида musiqa йўналишида тахсил олди.

Истеъдоди билан устозлари назарига тушган Ж.Козимов ўқишни тугатгач, 1983 йилда меҳнат фаолиятини ўзи тахсил олган институтнинг педагогика ва бошланғич таълим факультетида хор дирижери фани ўқитувчиси сифатида бошлади. Кейинчалик меҳнат фаолияти давомида musiqa назарияси, тарихи ва аънавий ижрочилик кафедраси катта ўқитувчиси, Самарқанд давлат университети педагогика факультети маънавият ва маърифат ишлари бўйича декан ўринбосари, musiqa таълим факультети декани, педагогика факультети декани ўринбосари, musiqa тарихи назарияси ва аънавий ижрочилик кафедраси доценти бўлиб ишлади.

Ж.Козимов 2019 йилдан умрининг охиригача, яъни 2020 йилгача Самарқанд давлат университети санъатшунослик факультети декани сифатида фаолият юритди. Бу вақт давомида устоз раҳбарлик лавозимларида ишлаш билан бирга, musiqa имлидан сабоқ берди, юзлаб шогирдлар тайёрлади. Самарқанд вилоятида musiqa санъатини ривожлантириш ва тарғиб этишда, ёш авлодга musiqa сирларини ўргатишда жонбозлик кўрсатган истеъдодли бастакор, хонанда ва мохир хор дирижери сифатида танилди.

Ўзбек халқ musiқаси, хор санъатини чуқур ўрганиб, «Хор жамоалари билан ишлашда дирижёрлик маҳора-



ти» «Мумтоз наволар» услубий қўлланмалари, «Мадҳингни қуйлайман, муқаддас Ватан» хор асарлари тўпланини, «Хор дирижёрлигида оддий ва мураккаб ўлчовларни ўрганиш услублари», «Якка ва кўп овозли қўшиқлар» сингари ўқув қўлланмалари яратди.

Бир қатор қўшиқлари «Ўзбекистон Ватаним меним», «Ягонасан муқаддас Ватан» республика қўшиқлар кўрик-танловларида, «Ниҳол» театр ва «Барҳаёт аъналар» фольклор кўрик-танловларида совринли ўринларни эгаллаган. Ижодкорнинг асарлари олий ва ўрта махсус ўқув юртлари, musiqa ва санъат мактаблари учун басталган қўшиқлари репертуарларидан, 20 га яқин қўшиқлари Ўзбекистон миллий телерадиокомпанияси олтин фондидан ўрин олган.

Бугунги кунда Javodbek Kozimovнинг ибратли ҳаёти ва ижоди Ўзбекистон-Финляндия педагогика институтида ўтказиладиган маданий тадбирларда, вокал ҳамда хор жамоаси учун басталган қўшиқлари дарс жараёнида доим эсланади, улардан фойдаланилади. Институтимизда Javodbek Жўрабекович Козимов номидаги синф хонаси ташкил этилган.

**Б.БОЛТАЕВ,**  
Ўзбекистон-Финляндия педагогика институти musiqa таълими кафедраси мудири, доцент.

РЕКЛАМА, E'OLONLAR, BILDIRISHLAR / Gazetamiz haftada uch marta - seshanba, payshanba va shanba kunlari chop etiladi / Gazetada chop etilayotgan reklama va e'lonlar tezkor, samarali va hamyonbop / MUHOJAAT UCHUN TELEFON: 66-233-91-56

### DA'VOLAR BO'LSA...

Samarqand shahrida xususiy amaliyot bilan shug'ullanuvchi notarius Zikirova Shahlo Habibovna notarial idorasida marhum Safarov Ulmaskul Mamirzayevichga (2014-yil 7-mayda vafot etgan) tegishli mol-mulk uchun meros ishi ochilmoqda. Shu munosabat bilan merosxo'rlarning Zikirova Shahlo Habibovna notarial idorasiga murojaat etishlarini so'raymiz.

**Manzil: Samarqand shahri Amir Temur ko'chasi, 156-uy.**

Past Darg'om tumanida xususiy amaliyot bilan shug'ullanuvchi notarius Ahatov O'lmas To'rayevich notarial idorasida marhum Xasanov Artikga (2011-yil 22-mayda vafot etgan) tegishli mol-mulk uchun meros ishi ochilmoqda. Shu munosabat bilan merosxo'rlarning Ahatov O'lmas To'rayevich notarial idorasiga murojaat etishlarini so'raymiz.

**Manzil: Past Darg'om tumani Juma shaharchasi, Nodirabegim ko'chasi, 26-uy.**

Past Darg'om tumanida xususiy amaliyot bilan shug'ullanuvchi notarius Hakimova Igora Hikmatovna notarial idorasida marhum Alladustov Azamat Jo'rakulovichga (2012-yil 20-yanvarda vafot etgan) tegishli mol-mulk uchun meros ishi ochilmoqda. Shu munosabat bilan merosxo'rlarning Hakimova Igora Hikmatovna notarial idorasiga murojaat etishlarini so'raymiz.

**Manzil: Past Darg'om tumani Juma shaharchasi, Nodirabegim ko'chasi.**

Samarqand shahrida xususiy amaliyot bilan shug'ullanuvchi notarius Zikirova Shahlo Habibovna notarial idorasida marhum Azimov Davron Xamrakulovichga (2023-yil 6-noyabrda vafot etgan) tegishli mol-mulk uchun meros ishi ochilmoqda. Shu munosabat bilan merosxo'rlarning Zikirova Shah-

lo Habibovna notarial idorasiga murojaat etishlarini so'raymiz.

**Manzil: Samarqand shahri Amir Temur ko'chasi, 156-uy.**

Samarqand shahrida xususiy amaliyot bilan shug'ullanuvchi notarius Nurqosimov Jamshid Sayfidinovich notarial idorasida marhum Mamatkulov Abdikadirga (2024-yil 4-yanvarda vafot etgan) tegishli mol-mulk uchun meros ishi ochilmoqda. Shu munosabat bilan merosxo'rlarning Nurqosimov Jamshid Sayfidinovich notarial idorasiga murojaat etishlarini so'raymiz.

**Manzil: Samarqand shahri Panjob ko'chasi, 4-uy.**

Jomboy tumanida xususiy amaliyot bilan shug'ullanuvchi notarius Mamatqulov Otabel Bolbekovich notarial idorasida marhum Pardayeva Raxat Bayxurazovnaga (2021-yil 17-sentabrda vafot etgan) tegishli mol-mulk uchun meros ishi ochilmoqda. Shu munosabat bilan merosxo'rlarning Mamatqulov Otabel Bolbekovich notarial idorasiga murojaat etishlarini so'raymiz.

**Manzil: Jomboy tumani Saroy ko'chasi, 15-uy.**

Jomboy tumanida xususiy amaliyot bilan shug'ullanuvchi notarius Mamatqulov Otabel Bolbekovich notarial idorasida marhum Mamasidikova Turunoyga (2024-yil 8-noyabrda vafot etgan) tegishli mol-mulk uchun meros ishi ochilmoqda. Shu munosabat bilan merosxo'rlarning Mamatqulov Otabel Bolbekovich notarial idorasiga murojaat etishlarini so'raymiz.

**Manzil: Jomboy tumani Saroy ko'chasi, 15-uy.**

Samarqand shahrida xususiy amaliyot bilan shug'ullanuvchi notarius Rahimova Komila Faxriyevna notarial idorasida mar-

### OCHIQ INTEGRAL MA'RUZA O'TKAZILADI

**2025-yil 17-may kuni soat 11:00 da SamDTU 1-son otorinolaringologiya va 2-son pediatriya kafedrasining otorinolaringologiya va pediatriya fanidan ochiq integral ma'ruzasi bo'lib o'tadi.**

**Mavzu:** "Surunkali tonzilning o'ziga xos kechishi, tekshirish tamo-yillari, asoratlari va davolash usullari. Bolalarda o'tkir revmatik isitma".

**Ma'ruzachilar:** 2-son pediatriya kafedrasida dotsenti M.J.Aralov va 1-son otorinolaringologiya kafedrasida mudiri professor N.J.Xushvakova.

**Manzil:** VBKTTM katta majlis-

lar zali 2-qavat (Samarqand shahri G'iyosiddin Jamshid ko'chasi, 21-"A" uy).

**Taklif qilinganlar:** pediatriya fakulteti talabalari, tinglovchilar hamda ushbu mutaxassisliklar bo'yicha ta'lim olayotgan talabalar, klinik ordinarlar va magistratura rezidentlari, o'quv bo'limi va barcha qiziquvchilar.

**Kafedra mudirlari:** 2-son pediatriya kafedrasida mudiri B.A.Yuldashev, stomatologiya fakulteti 1-son otorinolaringologiya kafedrasida mudiri N.J.Xushvakova.

hum Sitnikov Danil Timofeyevichga (2001-yil 6-fevralda vafot etgan) tegishli mol-mulk uchun meros ishi ochilmoqda. Shu munosabat bilan merosxo'rlarning Rahimova Komila Faxriyevna notarial idorasiga murojaat etishlarini so'raymiz.

**Manzil: Samarqand shahri Abdurahmon Jomiy ko'chasi, 51-uy.**

Samarqand shahrida xususiy amaliyot bilan shug'ullanuvchi notarius Hazratqulov Mahmud Mo'minqulovich notarial idorasida marhum Amrullayeva Maxsat Qobilovnaga (2024-yil 19-mayda vafot etgan) tegishli mol-mulk uchun meros ishi ochilmoqda. Shu munosabat bilan merosxo'rlarning Hazratqulov Mahmud Mo'minqulovich notarial idorasiga murojaat etishlarini so'raymiz.

**Manzil: Samarqand shahri Amir Temur ko'chasi, 36-uy.**

Samarqand shahrida xususiy amaliyot bilan shug'ullanuvchi notarius Bahromova Feruza Zoirovna notarial idorasida marhum Davronkulov Mardonqulga (2020-yil 28-oktabrda vafot etgan) tegishli mol-mulk uchun meros ishi ochilmoqda. Shu munosabat bilan merosxo'rlarning Bahromova Feruza

Zoirovna notarial idorasiga murojaat etishlarini so'raymiz.

**Manzil: Samarqand shahri Gagarin ko'chasi, 121-uy.**

Jomboy tumanida xususiy amaliyot bilan shug'ullanuvchi notarius Mirzayeva Barno Jo'raqulovna notarial idorasida marhum Buriyev Safar Kuvanovichga (2023-yil 21-oktabrda vafot etgan) tegishli mol-mulk uchun meros ishi ochilmoqda. Shu munosabat bilan merosxo'rlarning Mirzayeva Barno Jo'raqulovna notarial idorasiga murojaat etishlarini so'raymiz.

**Manzil: Jomboy tumani Zebuniso ko'chasi, 4-"A" uy.**

Samarqand shahrida xususiy amaliyot bilan shug'ullanuvchi notarius G'afarov Ulug'bek Rahimjonovich notarial idorasida marhum Axrorov Arslon Ashraboievichga (2024-yil 9-avgustda vafot etgan) tegishli mol-mulk uchun meros ishi ochilmoqda. Shu munosabat bilan merosxo'rlarning G'afarov Ulug'bek Rahimjonovich notarial idorasiga murojaat etishlarini so'raymiz.

**Manzil: Samarqand shahri Buyuk Ipak yo'li ko'chasi, 18-uy, 14-xona.**

### RAHMAT SIZLARGA, SHIFOKORLAR!

Inson hayoti, salomatligi hamma narsadan aziz. O'z kasbining fidoyi insonlari bor ekan, xalqimiz sog'-salomatdir. Nafaqadaman, yoshim saksonda. Yaqinda oyog'im bezovta qila boshladi. Kattaqo'rg'on shahar tibbiyot birlashmasiga bordim. Meni yaxshi kutib olib, davolashdi, ahvolim yaxshilandi.

Bu darddan forig' bo'lishimda mendan o'z maslahati va amaliy yordamini ayamagan shifokorlar travmatologiya bo'limi mudiri Davron Nazarov, katta hamshira Shaxnoza Qo'chqorova, hamshiralari Ilmira Xudoyqulova, Gulnoza Yarqulova hamda shifoxona ma'muriyati va barcha xodimlaridan juda minnatdorman.

Sizlarga mustahkam sog'liq, mashaqqatli ammo sharafli kasbingizga omad tilayman. Ilohim qo'lingiz dard ko'rmasin.

**Muhabbat HIKMATOVA,**  
Kattaqo'rg'on shahri.

Samarqand shahrida xususiy amaliyot bilan shug'ullanuvchi notarius Aliyeva Lola Zoirovna notarial idorasida marhum Urinbayev Sharifga (2023-yil 10-iyulda vafot etgan) tegishli mol-mulk uchun meros ishi ochilmoqda. Shu munosabat bilan merosxo'rlarning Aliyeva Lola Zoirovna notarial idorasiga murojaat etishlarini so'raymiz.

**Manzil: Samarqand shahri Amir Temur ko'chasi, 158-uy**

**BEKOR QILINADI**  
Samarqand viloyat bolalar kutubxonasi-ni (STIR: 206815479) dumaloq muhri va burchak tamg'asi yong'inda yonib ketganligi sababli bekor qilinadi.

Sharof Rashidov nomidagi Samarqand davlat universiteti rektorati, kasaba uyushmasi va Muhandislik fizikasi instituti jamoalari yadro fizikasi va astronomiya kafedrasida dotsenti Orif Mamatqulovga ukasi

**Sohibjon MAMATQULOVI**ning vafoti munosabati bilan hamdardlik bildirdi.

Mulohaza uchun mavzu



## Samarqandda nega

## "KARMASHKA"

## yo'q?

Yaqinda xorijdan qaytgan bir tanishim chet davlatlarning markaziy shaharlaridagi ko'chalar kengligi, ayniqsa, aholi turarjoylariga kirish uchun katta yo'llar yonida alohida "karmashka"lar borligini aytib qoldi. Bizda esa aksariyat yo'llar tor, bu ham yetmagandek, ko'p qavatli uylar va boshqa ijtimoiy obyektlarga kirish uchun alohida yo'lak yo'qligi bois ko'chalarda tirbandlik ortmoqda. Xo'sh, ayni muammoning oldini olish bo'yicha biror yangi loyiha yoki rejalar ishlab chiqilyaptimi? Masalan, bizda ham "karmashka"lar bo'ladimi?

Mavzu yuzasidan murojaat qilgan birinchi manzilimiz "Samarqand mintaqaviy yo'llarga buyurtmachi xizmati" davlat muassasasi bo'ldi. U yerdan olingan ma'lumotga ko'ra, bugungi kunda viloyatimizda 20262 kilometr ichki yo'llar bo'lib, shundan 7702 kilometri ta'mirlalab. Joriy yil 713 kilometrini ta'mirlash va 16,8 kilometr yangi yo'l qurish rejalashtirilgan. Biroq hozircha birorta ko'chani kengaytirish yoki unda "karmashka" qurish nazarda tutilmagan ekan.

— Tashkilotimiz ko'chani qurish yoki ta'mirlash ishlarida buyurtmachi vazifasini bajaradi, - deydi muassasaning loyiha-ta'minot bo'limi boshlig'i Sobih G'aybullayev. — Ya'ni, biz o'z tashabbusimiz bilan birorta ko'chani kengaytirish yoki unda "karmashka" qurishni amalga oshira olmaymiz. Buning uchun hududiy hokimlik qarori kerak. Xususan, bir ko'chani kengaytirish uchun uning ikki yonidagi qurilmalar, kommunal tarmoqlarni buzish yoki ko'chirish lozim bo'ladi. Qolaversa, daraxtlar bor. Ularni kesishga moratoriy e'lon qilingan. Bu murakkab jarayon bo'lib, unga ko'plab tashkilot va idoralar jalb qilinishi lozim.

Viloyatimizda bu masalada tajriba yo'q emas. Misol uchun, Usta Umar Jo'raqulov ko'chasida ichki yondosh yo'l tashkil qilingan. E'tiborlisi, bu qulaylik hovillarda istiqomat qiluvchi fuqarolar uchun xizmat qilmoqda. Nahotki shu tajribani ommalashtirish, hech bo'lmasa, yangi qurilayotgan aholi punktlarida shuni inobatga olishning imkoni yo'q, degan savol tug'iladi.

— Shahrimizga ochiq osmon ostidagi muzey, deya tarif berilishi bejiz emas, - deydi Samarqand shahar hokimi o'rinbosari kotibiyati mutaxassisi Eldor Tagiyev. — Uning har bir burchagi, ko'chasida YuNESKO ro'yxatiga kiritilgan madaniy meros obyektlari bor. Ko'chalarni kengaytirish uchun bu tarixdan voz kechib bo'lmaydi. Shu bois ko'chalarni emas, shaharning o'zini kengaytirish choralarini ko'rilyapti. Shuningdek, qo'shni tumanlar o'rtasida transport qatnovini tartibga solish uchun shaharda bir nechta halqa yo'llar qurilishi rejalashtirilgan. Natijada hududga kirib keluvchi transport vositalari soni kamayadi. "Karmashka" masalasiga kelsak, bu bo'yicha hali yangi loyiha yo'q.

Endi shu eshitgan va bilganlarimiz atrofida mulohaza qilib ko'raylik. To'g'ri, Samarqand shahri va hatto tumanlarimiz markazidagi asosiy ko'chalar bugungi kun transport oqimi talablariga javob bermay qoldi. Lekin bu muammoni bartaraf etish bo'yicha strategiy uchun madaniyatni chetlab o'tishga majbur qilishi mumkin. Masalan, transport vositalarining piyodalar yo'laklarida qoldirilishi har doim ham haydovchining madaniyatsizligini anglatmaydi. Unda boshqa chora bo'lmasligi mumkin. Xo'sh, siz nima deysiz, aziz mushtari? Yo'llarimizda tartib bo'lishi uchun nima qilishimiz kerak?

Asqar BAROTOV.

Axoli sonining oshishi ўz ўzidan oziq-ovqatga b'lgan talabni oshiradi. B'gun etiштирилаётган қишлоқ хўжалиги маҳсулотларининг ҳосилдорлигини ошириш учун турли кимёвий воситалар ишлатилапти. Бошқа юртлардан олиб келиниб экилаётган интенсив мевали дарахтлар ҳам шу муаммонинг бир ечими сифатида қаралади. Албатта, бу каби дарахтлар ерни, сувни, ўғитни тежаши билан анча фойдали.

Юртимизда бундай интенсив боғлар кўпайди, турли-туман мевалар сероб. Аммо хонадонларда мевали дарахтлар экилаётгани, борлари ҳам кесиб ташланаётгани кишини ташвишга солади. Ҳавонинг ифлосланиши, соя-салқин худудларнинг камайиб кетаётгани ҳақида фаоллар тинмай

## Тут ипак қурти озукасигина эмас



гапиряпти. Катталаримиз бунга эътибор беряптими, йўқми, алоҳида мавзу. Аммо бу келажакда ўнглаб бўлмас муаммоларга сабаб бўлади.

Масаланинг бошқа бир томонига ҳам эътибор қаратишни истардим. Ёшим саксон бешда. Иккинчи жаҳон урушининг фожиали оқибатларининг гувоҳи бўлганман. Меҳнат кучининг етишмаслиги, озиқ-овқат тақчиллиги ва очарчилик каби инсо-

ният бошига келган қулфатлар минглаб одамларнинг ёстигини қуритди. Ана шу оғир йилларда мевали дарахтлар одамларнинг яккаю ағона илинжи, умиди эди. Эсимда, одамлар тут пишғига етиб олса, энди оч қолмаслигига ишонар, дастурхонда асосий егулик тут бўларди.

Афсуски, қийинчилик даврида одамлар ҳаётини сақлаб қолишда асқотган мевали дарахтлар бугун камайиб боряпти. Айниқса, тутга пилла етиштиришда хомашё сифатида қаралмоқда. Унинг ўрнига даромадли соҳаларни ривожлантириш, ерлардан унумли фойдаланиш бахонасида тутзорлар йўқ қилинди. Албатта, бугун дастурхонимиз турли ноз-неъматларга тўла. Лекин табиатдаги ҳар бир неъматнинг қадрига етиш, уни асраб-авайлаш, борини исроф ва нобуд қилмаслик, кун келиб, шу неъматга зориқиб қолишдан асрайди.

Турди ТУРСУН,  
Пайариқ тумани.

Иккинчи жаҳон урушида қозонилган ғалабанинг 80 йиллиги олдиан



Иккинчи жаҳон уруши инсоният тарихида аянчли из қолдирди. Ўша йиллари кўплаб юртдошларимиз қатори Пахтачи (собик Пахтакор) туманидан ҳам 6039 нафар аскар урушга сафарбар этилган. Қонли жангларда уларнинг 1154 нафари ҳалок бўлса, 2359 нафари бедарак йўқолган. Урушдан тирик қайтганларнинг ҳам аксарияти жароҳатланган, баъзилари ноғирон бўлиб қолганди.

## Кўксини ўққа тутиб берган қаҳрамон

Айтиш жоизки, инсон жони энг қадрсиз буюмга айланган қонли урушда ҳам халқ қаҳрамонлари топилди. Улар жанггоҳларда мардлик кўрсатиб, сафдошлари, уларнинг тимсолида халқини ҳимоя қилиш учун жонини ҳам аямади. Хусусан, Пахтачидан чиққан Совет Иттифоқи Қаҳрамонлари орасида оддий чўпон Қудрат Суёнов ҳам бор эди.

Қудрат Суёнов 1919 йилнинг 6 февралда Урғуч қишлоғида туғилди. Отасидан эрта жудо бўлган, рўзгор тебратишда онасига кўмак бериш учун дастлаб қишлоғидаги молларни боқиб бериш, кейин колхозда турли юмушларни бажариш билан шуғулланди. 1939 йилда ҳарбий хизматга чақирилган Қудрат хизматни тугатишга улгурмай урушга юборилди.

Қаҳрамонимиз хизматни Марказий фронт таркибидagi 13-армиянинг 74-ўқчи дивизияси 109-ўқчи полкида бошлади. Дастлаб ефрейтор, кейин сержант унвонларига эга бўлди. Жангга бўлилма командири сифатида кирди. Урушда кучли аскар, яхши командир сифатида ном қозondi. Ҳатто жангларнинг бирда оғбидан оғир яраланиб, қишлоғига қайтариб юборилса ҳам соғайган, ҳарбий комиссариатга ариза бериб, жангга қайтди. У ўз сафдошлари, дўстларини душман қуршовида ёлғиз қолдира олмасди.

1943 йилнинг кузида Қ. Суёнов хизмат қилаётган полк жангчилари Украинанинг Корон туманидаги Оболон қишлоғи яқинида Десна дарёсини кечиб ўтади. Лекин минг афсуски, уларни дарё киргоғида мустаҳкам жойлашиб олган душман жангчилари кутиб турарди. Душман мустаҳкам қўрғончадаги пулемёт орқали аскарларни ўққа тутар, ер бағирлаб бораётганларни ҳам аяб ўтирмасди. Ажал тузоғига бошқалардан кўра Қ. Суёнов бошқарган бўлилма яқинроқ эди. Шунда ўзбек ўғлони икки жойидан яраланган бўлса-да, орта чекинмади, кўксини пулемётга тутиб бериб, ўзи душманга қарата гранаталар шодаси улоқтиришга эришди. Шу билан кўплаб сафдошларининг ҳаётини сақлаб қолди.



Бу муҳим воқеа 1943 йилнинг 12 сентябрида содир бўлган эди. Жангда мислсиз қаҳрамонлик кўрсатган ўзбек жангчиси "Биродарлар қабристонини" да дафн этилди. Собик СССР Олий Совети Президиумининг 1943 йил 16 октябрдаги фармонида асосан сержант Қудрат Суёнов "Совет Иттифоқи Қаҳрамони" унвонига сазовор бўлди. Қудрат Суёновнинг мардлиги ҳақида ҳикоя қилувчи "Ой бориб, омон қайт" фильми яратилди. Украинанинг Оболон қишлоғида ҳамда унинг ўзи ўққан ҳозирги 37-мактаба бюсти қўйилди, Зиёвуддин шаҳарчасидаги Хотира хиёбонида Ўзбекистон халқ рссони Аҳмадjon Шоймуродов томонидан яратилган маҳобатли ҳайкали қад ростлади.

Биз қаҳрамонларимизни унутмаймиз!  
Иззатулла НОРҚУВВАТОВ.

Унутмоқ осонмас уларни



## "Онажон, каъбам ўзинг, сенсиз жаҳонни на қилай?"

9 май - Хотира ва қадрлаш куни олдиан самарқандлик ижодкорлардан айримларини эслашни лозим топдик. Улардан шoir - салоҳиятли раҳбар ва таниқли боир Ҳайдар Яхёев (Ҳайдар Яхё).

Ҳайдар Яхёев 1927 йил 9 январда Самарқанд шаҳрида туғилган. 37 йилдан ортиқ вақт ҳуқуқни муҳофаза қилиш тизимларида турли лавозимларда ишлаган. Жумладан, 1964 йилдан 1979 йилгача Ички ишлар вазири лавозимда фаолият юритган, генерал-лейтенант унвонига сазовор бўлган. У нафақат нуфузли раҳбар, балки ижодкор ҳам бўлган, унинг бир қанча шеърли тўпламлари нашр этилган. Кўплаб шеърлари таниқли санъаткорлар томонидан қўшиқ қилинган.


Давлат ва сиёсат арбоби, шoir Ҳайдар Яхё 2013 йил 22 август куни 86 ёшида Тошкент шаҳрида вафот этган. Қуйида шoirнинг шеърдан намуна ўқийсиз.

## ОНАЖОН

Онажон, номинг дилимда жисм аро танҳо ўша,  
Шафқатинг битмас ҳазина менга минг тилло ўша,  
Ҳар нафас меҳринг булоғи, тошса бир дунё ўша,  
Кўз очиб кўрдим ўзингни, менга бир дунё ўша.  
Онажон, Каъбам ўзинг, сенсиз жаҳонни на қилай,  
Танда меҳринг ёнмаса, беҳуда жонни на қилай?  
Тарк этиб орому сабринг менга бахт бердинг мудом,  
Ҳам жигарпорам дея, чекдинг аламлар субҳу шом.  
Тоза қалбинг бўлди қанча-қанча қайгуларга жом,  
Сендан ўргандим буюк имло била ширин калом,  
Онажон, Каъбам ўзинг, сенсиз жаҳонни на қилай,  
Этмаса номингни ёд ўткир забонни на қилай?!  
Меҳрибон, мушфик, мураббий, бунча беозорсан,  
Жонажон, мунис, азизам, шодлигимга ёрсан.  
Хаста бўлсам, жонга дармон, ҳар сахар бедорсан.  
Гар йирок кетсам туну кун изларимга зорсан,  
Онажон, ўлгинг деди: сенсиз жаҳонни на қилай?  
Бўлмасанг бошимда сен, бу ошённи на қилай?!



Ушбу QR код орқали Zarafshon.uz телеграм каналда Ҳайдар Яхё сўзи, Шерали Жўраев ижросидаги қўшиқни тинглашигиз мумкин.



MUASSIS: Samarqand viloyati hokimligi

Bosh muharrir: Farmon TOSHEV

Gazeta O'zbekiston matbuot va axborot agentligining Samarqand viloyat boshqarmasida 2012-yil 30-martda 09-01 raqam bilan ro'yxatga olingan. Nashr 100. Indeks 438. 14 557 nusxada chop etildi. Buyurtma 190. Hajmi 2 bosma taboq, bichimi A-2

Gazeta haftaning seshanba, payshanba va shanba kunlari chiqadi.

QABULXONA: (66) 233-91-51, REKLAMA VA E'LONLAR: (66) 233-91-56

BO'LIMLAR: (66) 233-91-57, 233-91-58, 233-91-59, 233-91-61

MANZILIMIZ: 140100, Samarqand shahri, Ulug' Tursunov ko'chasi, 80-uy, Matbuot uyi.

Gazeta «Zarafshon» tahririyatining kompyuter bo'limida sahifalandi.

«Noshir lux» MCHJ bosmaxonasida chop etildi.

Korxonalar manzili: Samarqand shahri, Spitamen ko'chasi, 270-uy.

Bosishga topshirish vaqti: soat 18:30 da.

Bosishga topshirildi: soat 19:00

Navbatchi muharrir:

G'.HASANOV.

Navbatchi:

G.MO'MINOVA.

Sahifalovchi:

B.ABDULLAYEV.



Saytimizga o'tish uchun QR-kodini telefoningiz orqali skaner qiling

ISSN-201667X



Sotuvda narxi kelishilgan holda

